

TE HEHEURA A API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hóc: EPiti Toata i te Matahiti.

Nu. 6

Tiunu 1935

Mat. 29

*Ei feia rave hoi outou i te parau nei, eiaha ei feia faaroo
noa, i te haavare-noa-raa ia outou iho. Iakobo 1:22-25.*

Nafea Vau E Orai Au.

Nafea Vau e orai Au ?

O teie te hoê uiraa tei roto i te mana'o o te rahiraa o te
taata i teie nei mahana. Ua taffihia te mana'o o te taata nei
na roto i te mau haapiiraa a te mau Haapaoraa e vai nei i
nia i te fenua nei; te na ô maira te hoê, *A haere mai oe, teie
te parau mau, te, no ô maira te piti, e ere te reira, teie râ te
Ekalesia mau e te e'a te aratai atu ia oe i te ora; e na roto i
te reira mau parau ua taffihia te pae rahi o te taata i roto i
teie nei ao.*

Mai te mea ua tae mai ia'u nei te hoê faaueraa mai teie te
huru: *A hamani oe i te hoê pahi e ia au to'na hoho'a i to te
mau pahi tahito ra.* Nahea vau i te hamani i te reira ? E hae-

re anei au i rotopu i te mau taata ma te ani ia ratou ia faai-te mai i te huru no te hamaniraa, e ia ite au i to ratou mau mana'o e rave ia vau i te mea i hinaarohia e au, oia hoi, e hamani vau i to'u pahi ? E a ore ra e imi vau i roto i te mau parau tuatapapa no te mau feia tahito, ia ite au e, i te mau faito e te huru o te hamaniraa i to ratou mau pahi, e ia oti maitai ta'u haapiiraa i te reira mau mea, e papai vau i te hoê hoho'a ia au i to ratou pahi e i reira e haamata ia vau i te hamani i ta'u pahi.

Hoê â huru te Ekalesia nei, ua haere mai o Iesu i nia i te fenua nei e ua faatia oia i te Ekalesia, e ua horoa mai oia i te ture e te mana no te faatereraa i taua Ekalesia ra. Ua horoa mai Oia i te hoho'a e ua papaihia taua hoho'a, e to tatou mau tupuna, oia hoi, te mau Peropheta, e tei rotopu ia tatou i teie uei â mahana, taua parau tuatapapa ra, taua hoho'a e taua mau haapiiraa ra, oia hoi, te Buka tei parauhia te Bibilia.

Ia hinaaro tatou ia noaa mai te hoê haamaitairaa, te Ora, mai te au i tei papaihia i roto i taua Buka ra, e mea tia ia haapao tatou i te mau ture mai te au i tei papaihia i roto, no te mea, eita te taata e manuia na roto i te ofatiraa i te ture.

Te na ô maira te hoê parau tei papaihia i roto i taua Buka ra: te raau matumua i nia i taua e'a ra o te FAAROO ia ia Iesu Mesia; te 2, te TATARAHAPA; te 3, te BAPETIZORAA; te 4 te TUURAA RIMA no te horoaraa i te Varua Maitai. O teie ia te mau ture matamua tei horoahia mai ia haapaohia e te mau tamarii a te Atua, o teie ia te hoho'a no te taere e te mau raau tumu no taua Pahi tahito, ia ore ia haapaohia eita taua pahi tahito ra e oti.

Eaha teie mea i parauhia e FAAROO ? Te na ô maira to tatou tupuna: *O te faaroo nei, o te tiaturi ia i te mau mea e ti-ahia nei, e te ite i te mau mea aore e hi'ohia nei. Heb. 11:1.*

E mea tia ia noaa mai ia tatou teie mea e FAAROO. *Aore hoi au i haama i te Evanelia o te Mesia ra, no te mea, O te mana ia o te Atua, ia ora te feia atoa i faaroo ra. Roma 1:16.* Te taata tei ore ia'na te reira mea, eita roa ta'na ohipa e oti, no te mea o te faaroo o te mana ia. Mai te mea aita to tatou e faaroo (te maua), eita tatou e haamata i taua pahi ra. Te faaroo e te ohipa o te mea matamua ia no te faatiaraa i te Ekalesia, e a ore ra, te Pahi. *Mai te mea e faaroo to tatou aita ra e ohipa, e mea pohe ia. Iakobo 2:17.*

Ia noaa mai ia tatou te ' faaroo ora' oia hoi, te faaroo e te ohipa, ua haapii mai te Orometua rahi ia TATARAHAPA. A tatarahapa, e a fa'i mai i ta autou atoa ra mau hara, e eiaha outou ia hi'a i ta outou mau parau ino ra. *Ezekiela 18:30.* Eiaha tatou e faahapa i te ture, eita e manuia ta tatou ohipa. Te vai nei te ture no te mau mea atoa i roto i teie nei ao. Ia tamata tatou i te faatere i te pahi ta i'e i tua, ma te taa-mu maitaia te mau i'e i raro, e tere anei te pahi ? Ia tuu tatou i te pape i roto i tura mori no te machine, e tere anei te machine ? Eita, no te mea ua faahapa tatou i te ture o te pahi ta i'e e te machine, ia tatarahapa ra tatou e ia haapao i te ture o teie na mea e piti, e tere ia te pahi e te machine.

Na roto i teie ravea ta te Atua i horoa mai ia tatou nei, ia manuia ta tatou ohipa e ia noaa mai ia tatou te mea i hinaaro hia, oia hoi, te ORA. Te na ô maira oia e, *Ua parau atu-ra Iesu, Amene, Amene, e parau atu vau ia oe, ia ore te taata ia fanau i te pape e te Varua, e ore oia e ô i te basileia o te Atua ra. Ioane 3:5.* E nahea tatou i te bapetizo ? Te na ô maira te parau i papahia e te mau Peropheta tei papai i te hoho'a tei horoahia ia ratou e te Mesia, *E teie nei, ua tanuhia tatou e oia atoa, i te bapetizoraahia i roto i to'na ra pohe mai te Mesia i faatiahia e te mana o te Metua i te poheraa ra, ia haapao atoa tatou i te haerea e au i te ora api. Roma 6:4-5; Mareko 1:10; Ioane 3:23.*

Na teie mau parau i faaite papu mai, ia tatou, i te huru no te bapetizoraa ta Iesu i haapii mai, o teie te hoho'a ta'na i horoa mai i ta'na mau pīpī, e tera te tumu i papaihia'i i roto i te Bibilia. O te bapetizoraa utuhi, o te bapetizoraa mau ia.

Ia oti tatou i te bapetizohia, ua parau mai te Mesia, e tonohia mai te Varua Maitai ei ite, ei maramarama na oe i roto i teie nei ao. Ioane 11:26. E riro te Varua maitai ei lamepa, ei mori rahi no tatou, i to tatou haerea na roto i teie nei ao.

I to tatou haerea na roto i teie nei ao, a haapao tatou mai te au i te ture, e na te reira e aratai ia tatou na te e'a afaro, no te mea, *Te apiapi râ o te uputa e te piriha'o te e'a e tae atu ai i te ora e te iti hoi o te feia i ite atu i te reira.*

Papaihia e Le Roy Mallory.

Te Huero Iti.

I te taime i fanauhia mai ai te taata i roto i teie nei ao, ua tanuhia te hoê huero nainai i roto i te pāpā o to'na aau, e na teie huero nainai e aratai e e haapii ia'na i te mau mea no to'na haere raa na roto i teie nei ao, e na te reira e haapii ia'na, *te vai nei te hoê mana teitei i nia'e i to'na*, e na teie huero iti e faatupu i te hinaaro, i roto ia'na, ia haamori i te hoê mea. Te reira te tumu i haamori ai te tahi i te Atua, e te tahi te mahana, e te tahi tera mea e i tera mea.

Ia faaroo oia i te reo iti o teie hnero nainai, na te reira e faaite ia'na i te parau mau, e aratai ia'na na te e'a afaro te

aratai atu ia'na i te vahi no reira mai oia. Ia ore râ oia ia faaroo i teie reo iti, e e faatia i to'na iho hinaaro, e riro ia e, mai te mea ra ua pohe teie huero iti, no te mea eita teie taata e faaroo faahou i to'na reo, e teie te taime e rave ai teie taata i te mau huru hara e te mau huru ino atoa, no te mea aita to'na e paruru.

I te oraraa o Anatone W. IYINE, e rave rahi te mau matahiti ta'na i haere na rotopu i te *Ati Lamana* ia poro haere i te Evanelia, e te na ô maira oia e: *Aita roa oia i ite i te hoê Ati o tei ore i faaroo e, ua vai te hoê oraraa na mua i to ratou taeraa mai i roto i teie nei ao.* Na mua a'e i to ratou faarooraa i te Evanelia, aita ratou i ite papu i te huru no taua oraraa ra, e te tumu i tae mai ai ratou i roto i teie nei ao; area ra, teie te hoê aamu tei haapiihia'tu e ratou i ta ratou mau tamarii: *Na mua i to ratou fanauraa i roto i teie nei ao, ua parahi ratou i te tahi a'o i pihaiho i to ratou Fatu: e ia oti ta ratou ohipa i teie nei ao, e ho'i faahou atu ratou i taua vahi ra.* Te haapii atura hoi ratou e, te vai atura te hoê e'a afaro roa te aratai faahou atu i te taata i mua i te aro o tera Varua Rahi, e te mau taata tei hinaaro ia haere na nia i taua e'a ra, ia haapaohia e ratou te mau ture e tia'i. I roto i ta ratou haapiiraa, o Satane te tumu no te mau ino i roto i teie nei ao, e te ofi te tapao ia no'na, e na'na i afai mai i te mau hara atoa i roto i teie nei ao; e no te reira tumu, eita roa ratou e taparahi i te hoê ofi, no to ratou mata'u i taua mana ino ra; e haapiiraa tahito teie, e e haapiiraa nehenehe roa hoi.

I teie nei mau mahana, te vai nei te varua ino i rotopu ia tatou, e te tamata nei oia ia aratai ia tatou atoa no nia mai i te e'a afaro, i roto i te hara e te peapea. Te rave nei oia i ta'na ohipa i te ao e i te pô, aita roa oia e taoto. No reira a ara tatou, a faaroo tatou i teie reo iti, a haapii atu i to tatou

mau tamarii i te parau a te Atua, e tanu i roto i to ratou mau aau, te *Faaroo Rahi*.

Te vai nei te hoê aamu nehenehe tei papaihia i roto i te Buka a Moromona tei na ô mai: Aore â ratou i tama'i, aita râ ratou i mata'u i te pohe; ua rahi to ratou mana'o i te tiamâ o to rarou râ mau metua i to ratou iho ora: oia ia, i hapiihia na hoi ratou e to ratou mau metua vahine, ia ore ratou ia feaa, e faaora te Atua ia ratou.

Ua faatiatia maira ratou ia'u i te mau parau a to ratou mau metua vahine, ua ô maira, Aita matou i feaa e ua ite to matou mau metua vahine i te reira. Alama 56:47-48. Na teie mau parau i faaite mai ia tatou i te faaroo rahi o teie mau taata apî e 2.000. I te tai-me i haere atu ai teie mau taata apî e 2.000, a Lamana, ia tama'i i roto i te nuu a Helamana, ua tanuhia i roto i to ratou mau aau te faaroo rahi, i to ratou Atua, no te mea, na to ratou mau metua vahine i haapii atu ia ratou e, *Eiaha e feaa i te Atua, e na'na e paruru ia outou*. E aita te hoê no ratou i pohe i roto i taua tama'i rahi ra.

No reira a faaitoitō â tatou i te haapii atu i te Evanelia i to tatou mau tamarii.

Papahia e Muria Mallory.

To matou mau Orometua Matamua.

Ua tae mai ia'u nei, no te fenua Amerika mai, te hoê rata na to'u tuahine, e i roto i taua rata te faaite mai nei oia ia'u e, *te vai nei te tahi mau utuafare fetii no tatou oia hoi, te tahi mau fetii o Noa Roterā (Noah Rogers)*. Te vai nei te hoê rata i roto i to ratou rima, oia hoi, te hoê rata tei papaihia e Noa ma i te Peretiteni ra o Birigama Youne, i te matahiti 1844. No reira ua patapatu vau i te hoê hoho'a na

oe ia tia ia oe ia faaite atu, te reira, ia ratou te mau taata no tena paeau moana ra, ia ite ratou e, e Orometua Momoni mau to tatou tupuna tane, oia hoi o Noa Roterā.

Teie te hoho'a o taua rata ra; ua papaihia te reira e Noa ma ia Birigama Youne tei parahi i Roto Miti, Utaha, i te tai-me i farii ai oia i taua rata nei.

Papeete, Tahiti, te 15 no Atete 1844.

Na to matou Peretiteni o Birigama YOUNE,

Ia orana outou.

Ua tae mai ia matou te hoê ravea e tia'i ia matou i te haponono atu ia outou, ta matou mau rata. Te faaite atu nei matou, ia outou, te mau ohipa manuia, a te Fatu, tei ravehia i teie fenua ê, e te mau parau rii apî.

Ua tae matou i te hoê fenua mou'a, o Tubuai ia, e mea fatata e 300 maile te atea i Tahiti. Aita roa te raatira i hinaaro i te haere i taua fenua ra, area ra, na roto i te tereraa o te pahi ua tae matou i reira. Ua tonono atura te raatira i te hoê poti no te imiraa i te mea ta'na i hinaaro i te hoo mai. Na roto i taua imiraa ra ua farerei matou i te mau taata no uta. Ua mauruuru matou i te reira no te mea e, e mea huru maoro matou te faaearea i nia i te pahi, oia hoi, e hitu ava'e te maoro to matou faaearea i nia i te pahi. I to matou faaearea i taua fenua ra faaroo ihora matou e, e mea itoitoe roa ratou i te haapaoraa i te Evanelia. Ua faaroo ratou e, e orometua papaa matou, hinaaro ihora ratou ia parahi matou i pihaiho ia ratou, no reira ua paraparau ihora matou i nia i taua mana'o ra, e ua faataahia o PARAITA no te parahi i reira ei Orometua, e ua reva'tura matou i Tahiti. Ua tae matou i Papeete i te 14 no Me i te matahiti 1844, e aita i maoro i muri iho, manuia roa a'era maua i ta maua ohipa.

Ua a'o atu maua i te Evanelia i te mau Sabati atoa i roto i te reo baratane. E mea rahite mau taata i tae mai i te mau pureraa. Te haamata nei ratou i te farii i te mau mea i a'o-hia'tu e maua ia ratou. Ua baptizohia e maha taata i teie nei, e eita e maoro e nehenehe ia maua ia baptizo i te tahi atu â mau taata, no te mea te vai ra te hoê mea, i roto i to maua aau tei na ô mai e, *a faaitoito noa, te tauturu nei au ia orua*. E mea fifi ta maua ohipa i rotopu i te mau taata i ônei no to ratou mau peapea. Tei roto ratou i te mau peapea huru rau i te pae varua noa'tu e, ua rave te mau mitinare i te ohipa i rotopu ia ratou e 50 matahiti te maoro.

Ua tae mai ia maua te hoê rata, na PARAITA, e te faaite mai nei oia i te huru no te mau ohipa no te Amaa i Tubuai ra. E mea itoito roa ratou i roto i te faatiaraa i te Ekalesia, e ua tae atoa mai te hoê parau no te mau fenua i fatata i Tubuai ia'na tei na ô hia te papairaa, *a haere mai oe e poro-haere i te Evanelia ia matou atoa*. Ua faaite atoa mai oia e, mea rahi te mau taata i Tubuai tei hinaaro i te baptizoraa, te tiaï nei râ oia ia ite ratou i te mau faaueraa a te Ekalesia, e na muri e baptizohia ratou.

Aita roa matou i faaroo i te hoê parau apî mai to matou revaraa mai, mai te fenua Amerika, e tae roa mai i teie nei. E ere i te mea pinepine te pahî i onei, no te mea, e mea atea roa teie mau fenua nei. No reira, te hinaaro nei matou ia faaite mai outou i te mau mea ta outou i hinaaro ia ravehia e matou i teie paeau moana nei.

A farii mai i to matou aroha ia outou.

Papahia e Noa Roteri, Beniamina Turuati.

O to'uia tupuna tane o Noa ROTERA, e o oia te Orometua Momoni tei haere mai i teie pae ao i te matahiti 1844. Te

vai ra te mau parau tuatapapa no teie Mitioni i te Fare Toroa o te Ekalesia, i Roto Miti, e te vai atoa ra te tahi mau parau tuatapapa no'na i roto i te rima o to'u mau fetii. Teie nei rata ra, e faaiteraa ia e, no tatou mau te mau ohipa i ravehia e NOA i to'na faaearea i teie nei pae ao moana nei.

Papathia e Rotera Orometua.

Na te Heheuraa Apî.

Ua oaoa roa matou i te farereiraa i na taata Hawaii o tei tere mai no te Amuira rahi a te Ekalesia, i Roto Miti. Ua tae mai ratou i te pae matamua no Eperera, e te haere noa nei â ratou e farerei i te mau Orometua tahito o tei haere i Hawaii, e te na ô mai nei ratou e, e mea au roa to ratou mau haereraa i ô nei.

Ua faatupuhia te hoê oro'a farereiraa na ratou i Logan nei i te 27 no Eperera nei. Ua horoahia'tu te faatereraa i te vahine a te Peresideni no te Misioni i Hawaii, o tei tere atoa mai, na Hawaii mai, no te aratai ia ratou i te mau vahi ta ratou e haere. Ua tae atoa mai te mau Orometua tahito o tei haere e poro-haere i te Evanelia i te pae ao moana. E piti hanere taata tei tae atu i te reira farereiraa. Ua himene noa teie mau taata Hawaii i ta ratou mau himene navenave, e ua faaite noa mai ratou i to ratou mau mana'o no te huru no te Ekalesia i Hawaii, e tae noa'tu i te hora 12 i te pô.

I te Sabati, oia hoi, te 28, i te hora piti i te ahiahi, na teie nei mau taata Hawaii i faatere i te pureraa i roto i te Fare pureraa rahi i Logan, oia hoi, te Tabernacle, e i roto i taua pureraa ra ua a'o paatoa mai ratou i te Evanelia ma te faaiteraa mai e, ua ite paatoa ratou e, o te Ekalesia a Iesu Mesia

i te Feia Mo'a i te Mau Mahana Hopea Nei ia te *Ekalesia mau a te Atua*. Ua faaite atoa mai ratou i to ratou mauruuru no te mea ua haapao maitaihia ratou e te mau taata Marite nei.

Teie te mau i'oa o te mau taata tei tae mai, oia hoi, o Sister Murphey, te vahine a te Peresideni no te Misioni i Hawaii e ta'na na tamahine toopiti, o Lili raua o Maui, o Rahera Johnson, o Deering taeae e ta'na vahine o Lili, o Dina Pokiui tuahine, o Davida taeae e ta'na vahine e o Lele'ulima taeae. No te mau motu atoa ratou no Hawaii, ua maitihia ratou e te mau taata no te Ekalesia, i reira, ia haere mai i Amerika ia mataitai ratou i te huru no te Ekalesia i onei. Ua here roahia ratou paatoa, e matou nei, no te mea hoê â ratou e te mau taata Tahiti ta marou i ite i tena paeau ra.

Ua haere au e ua paraparau vau ia ratou i muri iho i te pureraa, e ua faaite maira ratou e, e maha hanere taata apî tei bapetizohia i roto i te Ekalesia i Hawaii, i teie matahiti i mairi a'enei, e no reira, ua ite au e, te tupu noa nei â te Ekalesia e te haere noa nei te ohipa a te Fatu i mua.

Ua na ô maira ratou ia'u, a faaite atu oe i te mau taata i Tahiti e te mau fenua i fatata'tu i reira e, te aroha'tu nei ratou ia outou paatoa.

Papaih'a e Mitiela

E ao to tei hamani ino-hia i te parau-tia ra; no ratou hoi te basileia ra o te ao. E ao to outou ia faaino mai, e ia hamani ino mai, e ia pari haavare noa mai te taata ia outou i te mau ino atoa nei, No'u. A oaoa, e ia ou'aou'a noa i te oaoa; e utua rahi hoi ta outou i te ao ra; i na reira hoi ratou i te hamani ino i te mau Peropheta ra, o mua ia ia outou. Mataio 5:10-12.

TE MAU PARAU API

Na te manumanu iti i tapea ia'na.

I to te vahine faatere pahi reva ra o Amelia EARHART tamataraa i te faatere i to'na pahi reva mai te oire ra o Burbank, Tarafonia, i te oire ra o Mexico, ma te tapae ore, aita roa oia i manuia, no te mea ua ô te hoê manumanu i roto i to'na mata e no te puai o te mauuui ua tapae oia i te oire ra o Nopala, e 60 noa iho maile te atea i ta'na vahi i titau.

I muri iho i te horoiraa hia to'na mata, ua faatere faahou oia i ta'na pahi reva e tae atura oia i te oire ra o Mexico na muri roa i te hora i mana'o hia, e noa'tu ra i te reira te tiai noa ra 10.000 taata ia'na i reira.

E aueueraa fenua rahi mau.

I te 22 no Eperera i mairi a'enei, ua tupu te hoê aueueraa fenua rahi ri'aria i nia i te motu ra o Formosa, Japone. No te puai o te aueueraa, aita rea e mea i toe tei ore i parari i roto i te mau oire e i te mau mataeinaa'atoa hoi. Mai te au i te tai'oraahia, e te mau taata no te hau, ua noaa e 3.165 taata tei pohe roa, e 9.478 tei paparu e e 31.000 fare tei parari e tei pau i te auahi e te rahiraa o te mau fare, o te hau ana'e, e tae te faufaa i te 8.550.000 tara moni farani, tei pau i roto i taua ati ra.

Ua uuru atoa te Liona.

Teie te aamu no te Liona tei fatata roa i te haaparari i na pahi e piti na roto i to'na uururaa.

No te ino o taua Liona ra, ua pohe roa te hoê taata ia'na, te afaihia ra oia mai te oire ra o Helsingfors, Finland, i te oire ra o Tallinn, Esthonia, na nia i te hoê pahi, e i te taeraa i tua ua farerei ratou i te rupehu, e i reira ua faatai pinepinehia te pû o te pahi no te faaararaa'tu i te tahi mau pahi. A faaroo ai taua Liona ra i te pû, hahmata'toa atura oia i te uuru i te mau tairaa pû atoa e ua riro te reira ei arearea na te mau taata i nia i te pahi.

Aita ra ratou i arearea maoro, no te mea, a faaea ai te maniana, ua faaroo ratou i te pû no te tahi pahi i mua ia ratou; i te reira taime ua faatai

te raatira i te pû e piti taime ei faaiteraa i te pahi i mua ia tipuu i te pae atau. I taua taime ihora uuru atura te Liona e ua mana'o te raatira o te tahi pahi o te toru te reira o te ta'iraa pû, no reira tapea ihora oia i to'na pahi i nia i te e'a o te tahi tei moe i roto i te rupehu, a ua fatata roa teie nau pahi i te û no te uururaa o te Liona ra.

E Pahi rahi mau.

Ua oti a'enei te hamanihia, e te Taiete Pahi Farani ra te Compagnie Generale Transatlantique, te pahi rahi ra o NORMANDIE. Ua riro taua pahi ra ei pahi rahi roa a'e i te mau pahi atoa i te ao nei, no te mea e toru hanere e hoê ahuru ma toru, 313, metera to'na roa, e maha ahuru e tiahapa metera i te aano, e to'na faito e tae ia i te hitu ahuru ma toru tauatini, 73.000 tane. I na mahana hopea no te ava'e Me i mairi a'enei, ua faarue taua pahi ra i te fenua Farani no te haere i Amerika, e i te pô monire te 2 no Tiun uua faaitchia, na roto i te radio, ua tae taua pahi rahi ra i te oire ra i New-York, e ua pau e iva ahuru ma iva, e 99, hora i to'na tere-raa matamua mau, oia hoi, ua tae to'na tere i te toru ahuru ma piti, 32 maile i te hora hoê e na roto i taua mau faito ra, ua riro taua pahi ra ei pahi rahi a'e e te tere i te mau pahi uta taata i te ao atoa nei.

E Tamarii maere mau.

Ua iteahia a'enei i nia i te hoê motu no Fidji, te hoê aiu maere mau. Te parau nei te taata tei ite i taua aiu ra, e toru to'na upoo, hoê upoo rahi e e piti upoo nainai, e to'na nau rima e nau ave rii, e mea tuati te mau manimani mai to te moora, e te vahi maere roa, e nau metua maitai roa to'na.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.